



Agency for Development of Higher Education and Quality Assurance

**Saopštenje sa 5. sjednice Upravnog odbora Agencije za razvoj visokog
obrazovanja i osiguranje kvaliteta**

održane 05.10.2009. godine u Mostaru

Peta sjednica Upravnog odbora Agencije za razvoj visokog obrazovanja i osiguranje kvaliteta održana je u Mostaru. Na sjednici, kojom je predsjedavao prof.dr Mišo Kulić, predsjednik Upravnog odbora, jednoglasno je usvojen Statut čime je okončana institucionalna izgradnja Agencije.

Upravni odbor Agencije dao je saglasnost na dva ključna dokumenta kojima se, praktično, uspostavljaju temelji za sistem osiguranja kvaliteta u BiH. Usvojena je Odluka o kriterijima za izbor domaćih i međunarodnih stručnjaka koji daju ocjenu i obavljaju reviziju kvaliteta na visokoškolskim ustanovama i studijskim programima u Bosni i Hercegovini. Takođe, data je saglasnost na Odluku o načinu formiranja Komisije za izbor domaćih i međunarodnih stručnjaka koji daju ocjenu i obavljaju reviziju kvaliteta na visokoškolskim ustanovama i studijskim programima. Navedene odluke predstavljaju prve dokumente kojima se regulira oblast osiguranja kvaliteta, a čije donošenje je, kako je propisano Okvirnim zakonom o visokom obrazovanju u BiH, u direktnoj nadležnosti Agencije i Upravnog odbora.

Upravni odbor usvojio je Uputstvo o obliku i sadržaju diplome i dodatka diplomi koje izdaju akreditirane visokoškolske ustanove. Ovim dokumentom uvodi se jedinstven obrazac diplome i dodatka diplomi, te se propisuje obaveza visokoškolskim ustanovama da izdaju ovaj dodatak. Dodatak diplomi je izrađen tako da pruži opis prirode, nivoa, konteksta, sadržaja i statusa kojeg je pohađao i uspješno završio pojedinac imenovan na originalnoj kvalifikaciji kojoj je ovaj dodatak priložen.

Na sjednici je jednoglasno usvojen Izvještaj o radu Agencije za razvoj visokog obrazovanja i osiguranje kvaliteta za period prvih šest mjeseci 2009. godine.